

『日本三代実録』42 元慶六年六月三日条

甲戌三日甲戌。權僧正法印大和尚位遍照起請七条、頒下所司。其一。応令僧綱兼任諸寺別当者、以四年為秩限事。式云。凡諸大寺并有封寺、別当三綱、以四年為秩限、遷替之日、即責解由。但廉節可稱之徒、不論年限、殊録功績、申官褒賞。自余諸寺、依官符任別当及尼寺鎮、並同此例。其未得解由之輩、永不任用、又不預公請。但僧綱別勅任別当者、不在此限者。因茲、僧綱一任之程、永期終身。或夏臈差積、還嬾修治、或春秋漸高、更倦釐務。此不立秩限之到所也。伏望。自今以後、更立秩限、同責解由。但未得解由者、特免不預公請之責、以令知僧綱之貴。云々。」其四。日。応令治部玄蕃等省寮、押署戒牒并捺印事。貞觀七年三月十日（廿日）格曰。少僧都法眼和尚位惠運牒狀稱。伏檢旧例、凡有得度者、先与度縁、次令入寺。每年三月以前、放牒諸寺、令進当年可受戒交名、会集綱所、治部玄蕃共勘知名籍、然後令登壇受戒者。今聞。頃年受戒之輩、事多不法、只以戒牒、專為公驗、自称真僧、眩人耳目。因茲、邦家少輸貢之民、都鄙多濫吹之僧。伏望。自今以後、受戒之日、省寮威徒（威儀師・徒儀師）、共向戒場、子細勘会官符度縁、即令登壇受戒。便收取受戒者戒牒、具注後紙、以其本籍姓名、省寮共押署、捺以省印、五月以前、下放僧綱。僧綱、六月一日、頒給受戒者、嚴 勅有司、不便違期。若有持白紙戒牒者、処以違勅。」其五。応諸寺別当被補之日、令省寮僧綱承知事。式云。凡諸寺以別当為長官、以三綱為任用。解由与不勘知并覺举遺漏、及依理不尽返却等之程、一同京官。其与不之状、令綱所押署者。又云。未得解由之輩、永不任用、亦不預公請者。然則、綱所須勘知其与不之由、依状進止。而件別当任符、不被下於綱所。自官底而頒給。綱所不知補任之年月、何詳解由之与不。因茲、行事之場、有煩勘拋、公請之日、無由進退。伏望。自今以後、件任符、被下綱所、詳知然後頒給。其与不之状、綱所押署、伝進所司者。如此奏状、欲下任符。縦令綱所承其由、雖無任符、自知任限。今須件別当被任之日、必令省寮僧綱承知、不可更下任符。」其六。応令五畿七道諸国、依実放生事。天平宝字三年六月廿日格曰。唐曇靜法師奏狀稱。夫蠢々昆■、誰無畏死。振々■走、咸有愛身。故殺生招短命之報、救死保長年之福。伏請遍 勅諸国、立放生池、嚴加禁断、不許捕漁。奏可者。自尔而降、 勅每国置放生田、以其穫稻、充贖死之資。而今聞。諸国臨放生之時、兩三日、下符諸郡。郡司百姓、聚不要之虫介、候国宰之臨視、比及数日、死者過半。夫放生者、所以活欲死之命、続將絶之生也。今如所聞、名称放生、実似殺生。伏望。自今以後、使講読師、若部内淨行僧、臨漁釣之江海、尋田獵之山林、贖懸魚於網罟之中、救窮獸於弓矢之下。但其料物者、歲始令件等僧一向領之、即年終具注所贖之色、符帳言上。」其七。応禁流毒、捕魚事。如聞。諸国百姓、每至夏節、剥取諸毒木皮、搗碎散於河上。在其下流者、魚虫大小、举種共死。尋其元謀、所要在魚、至于虫介、無用於人。而徒非其要、共委泥沙。人之不仁、淫殺至此。夫先皇永遺放生之仁、後主盍除流毒之害。伏望。自今以後、特禁一時之殺、將救群虫之徒死。」勅。宜俾内外遵行。